



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 3

Libya tzumetsung nung asur
3,958 jungogo: UN

Kharge-i Parliament nung Women
Reservation Bill benoktsu akhanger



VOL. XX NO. 338 (ADOK 338) DIMAPUR SANGTENNÜ (TUESDAY) RONGJUI (SEPTEMBER) 19, 2023 ₹ 5.00

Nagaland nung World Bamboo Day mongogo

Dimapur, September 18, 2023 (TYO): Nagaland Bamboo Development Agency (NBDA)-i Nagaland Bamboo Resource Centre, Sovima nung World Bamboo Day ayongzuka mongogo.

“World Bamboo Day ya aou indang osang prokshitsü atema dang masü saka aou ajanga tajangzük balala agütsüba indang metetdaksütsü atema amonger” ta iba sentong nung Principal Secretary & Development Commissioner R Ramakrishnan-i o jembidang ashi.

World Bamboo Organization ajanga aou ya kanga dang tongtipang tenügdaksü ka ta ajungkettsü atema World Bamboo Congress mapang September 18, 2009 nü World Bamboo Day amongtsü ayongzük. World Bamboo Day ya aou dak sendakba teloktem, lipoküm atema inyakertem, sorkartem aser aou tsünürtemi yaritepa amonger, ta Ramakrishnan-i ashi.

World Bamboo Day ajanga aou tapu balala nung amshiba ajungketer. Ki asüba nungi tenzüker osettsüset, aben-süoshi aser tapu aika nung aou amshir ta paisa ashi.

Aou ya arem shiruru aika atema kanga tongtipang anungji World Bamboo Day amongdang aou wazüka ayutsüba osang prokshir ta paisa shisem.

“Nagaland nung aou ya kanga tongtipang green resource ka lir aser nisung ajaki nüngdaker. Iba jagi Nagaland Bamboo Development Agency-i National Bamboo Mission, Government of India guidelines sülen anidakba mapa balala inyaka arur” ta Ramakrishnan-isa metetdaksü.

National Bamboo Mission aser National Mission on Bamboo Applications teyari agia

Rahul anema jembiba atema okadaki CM Sarma-i ajar

Guwahati, September 18, 2023 (Agencies): 2022 Uttarakhand assembly election campaign mapang Assam Chief Minister Himanta Biswa Sarma-i Congress lennir Rahul Gandhi anema jembiba atema pa okadaki jaokogo.

Udham Singh Nagar district and sessions court-i CM Sarma dang September 21 nü okadaki arutsü tetuyuba agütsü.

February 2022 nung public sentong ka nung o jembidang Himanta Sarma-i Rahul'er kibong ashishitep aser tetsü Sonia Gandhi anema o tamajung jembiba ta Uttarakhand Congress spokesperson Ganesh Upadhyay-i ken o benokba nung

NBDA-i Nagaland nung aou dak sendakba maparen aika inyaka arur. Mapang tatsüka tsüingda NBDA-i bamboo handicrafts and furniture, bamboo shoot, bamboo charcoal, bamboo mat, bamboo incense sticks, bamboo blinds amala mapa nung entrepreneurs aika aniokogo, ta pai ashi.

NBDA-i state ajungalen teka mapa inyakertem, aluyimertem aser Self-Help Groups nem teyari balala agüja arur. NBDA-i kanga dang tongtipang mapa ka inyakertem marketing strategy lir aser iba asoshi private marketing houses aser entrepreneurs den yariteper, ta Ramakrishnan-i metetdaksü.

“Nagaland Bamboo Development Agency-i bamboo industry tuluba ajungketnür aser iba atema entrepreneurs shilem kanga tongtipang lir. NBDA-i integrated bamboo Park aser bamboo pulp production centre lapoknür aser tang Nagaland Bamboo Resource Centre nung cane and bamboo technology park ka teyangludak lir” ta paisa ashi.

NBDA-i National Bamboo Mission den mapa kanga junga inyaka arudar aser taküm July ita International Agriculture & Horti Expo nung Excellent Achievement Award ngutetogo, ta Ramakrishnan-isa ashi.

World Bamboo Day amongdang Mhaleu Metha nem ‘Bamboo Entrepreneur Award’ 2023 aser Yimkum, Aitlenden, Tuli nem Bamboo SHG Award 2023 agütsü.

Iba sentong nung NBRC Office Complex nung R. Ramakrishnan, IAS-i World Bamboo Day wako atsüket, Mission Director, NBDA Tarep Imchen, IAS-i tesentepertem pelaa agizük aser NBDA team member Er. Vezota Khusoh-i ‘World Bamboo Day’ osang lemsatep.

ajemdaker Uttarakhand court-i Assam CM Sarma jaokogo.

Sarma-i olen anaprong kanga mejungi jembiba aser Information Technology Act tim mesüi amshioigo ta Upadhyay-isa tai tonglokja lir.

“Uttarakhand aser linük asoshi konang General Bipin Rawat lenisüba kübok India-i Pakistan nung surgical strike agi. Idangji Rahul Gandhi-i iba strike indang kuli meshi. Onoki nü dang na shir jabaso'ar kuli meshi asü? Nai armed forces indang kuli meshitsü kechi temeten lir?” ta Sarma-i o jembidang ashi.

Iba ken o angadangtsü atema Uttarakhand okadaki Assam CM Sarma jaokogo.

CM Neiphiu Rio-i Northeast shishilembartem longjemtsü ayongzük



Hombarnü Niathu Resort nung mezüngbuba North eastern State Chamber of Commerce & Industry Business Conclave nung Nagaland Chief minister Neiphiu Rio-i CoNESCCI logo sayatsüba angur.

Dimapur, September 18, 2023 (TYO): North East ya state balala loktepa tesem ka dang masü saka tashi tulu aketba tesem ka lir ta Nagaland Chief Minister Neiphiu Rio-i ashi.

North East ya powerhouse tulu ka lir aser state balala tsüingda yaritepa mapa aika inyakertem maongka lir ta CM Rio-i ashi.

Niathu Resort Chumukedima nung mezüngbuba North Eastern States Chamber of Commerce & Industry Business Conclave nung jembidang Rio-i “ NE region nung alima rongsen jenti lir” ta ashi.

Asenoki item rongsen agiteta agitsü atema policy tajungtem yanglutsüla aser iba ajanga mapa aika adokdaksütsü, rongsenketzung renloktsü aser asen senmang kümzüka ayutsü, ta Rio-isa ashi.

“Asenok sendaktepsüla aser yaritepsüla aser tarutsü atema roadmap ka yanglutsüla. Iba conclave ajanga North East nung azükaru aser terenlok putu tasen ka lapoktsü merangdi” ta paisa ayongzük.

India ainba aser tejakleni aoba nung north east-i shilem agitsü aika lir. Talisa asen lanurtemi takok angutsüba dang masü

saka linük yangerba mapa nung shilem agidaksütsüla, ta CM Rio-i ashi.

“India aser Southeast Asia tsüingda asenok aliba ya kanga tia taka lir. Act East Policy ajanga asenoki shishilembatsü atema maongka tulu agütsür. Anungji asenok külemi longjemer northeast ajangzüksü atema policy tajung yangludi arung” ta paisa ayongzük.

Confederation of North East States Chamber of Commerce and Industry (CoNESCCI) tentetba ajanga North Eastern State ajak külem taginüba aser tashi longjemba sayur ta paisa shisem.

March 24, 2014 nü Nagaland Legislative Assembly-i Nagaland Special Development Zone (NSDZ) tentettsü bangzüngtepa lir. Asenoki land laws salatsüla aser tangalen nungi shishilembartem temulung uludaksütsü atema maparen tenzüksüla. Talisa Nagaland kübok tenemtsünglen aliba tesemtem nung asenoki shishilembaba maparen inyaktsüla ta CM Rio-isa metetdaksü.

“State sorkari March 24 nü bangzüngtepa aliba mapa küma inyaktsü atema ali kiburtem,

yimdaklirtem mesüra civil societies-i sorkar den tongtepa inyakimtem latettsüla. Iba lemtet tekaraba nung mapa küma tenzüksü atema state sorkar ajanga September 6, 2023 nü Chief Minister-i aniba Ministerial Committee ka aser Chief Secretary-i aniba High Powered Committee tentetogo” ta CM Rio-i ashi.

Committee ana yagi tang aliba State laws, orders aser instructions reprangshitsü aser NSDZ project tenzüksü atema Masterplan ka renemtsü, ta paisa ashi.

Iba sentong nung Chief Minister Rio-isa Confederation of North Eastern States Chamber of Commerce and Industry indang logo sayatsü.

Sentong nung National Traders Welfare Board, Government of India chairman Sunil Jeevraj Singhi-ia o jembiba aser Convenor, CoNESCCI & Chairman Assam Chamber of Commerce & Industry Rupam Goswami-i okila jembiba.

Arunachal Pradesh, Assam, Meghalaya, Manipur, Mizoram, Tripura aser Nagaland nungi Chambers of Commerce & Industry züngsemtem iba conclave nung shilem agir.

Abu Metha-i Japanese Embassy ketdangsürtem den senden amen



Abu Metha-i Japanese Embassy of India ketdangsürtem den ajurutepdang agiba noksa ka angur.

Kohima, September 18, 2023 (DIPR): September 18, 2023 nü Advisor to Chief Minister aser Investment & Development Authority of Nagaland Chairman Abu Metha-i Japanese Embassy of India ketdangsürtem den senden ka menogo.

JICA, Kohima nung senden amendang Japan den yaritepa mapa balala inyaktsü aser tesentaktep akangshitsü onüktem lemsatep.

Japanese aser Naga nung tsüingda amalitep aliba ajanga tesentaktep akangshitsü, people-to-people contact

tajungba akümstü aser nübortem asoshi tajangzük alitsü ta Abu Metha-i ashi.

Tarutsü nung Japan den development, livelihood enhancement, conservation, climate change amala maparen nung yaritepa mapa inyaka aotsü imlar, ta paisa ashi.

Mokokchung nung Indian Swachhata League 2.0 tenzükogo



Imkongmeren Sports Complex, Mokokchung nung Hombarnü Swachhata League 2.0 semzükba mapang ADC & Administrator, MMC, Mokokchung, Chumlamu Humtsoe-i iba sentong nung adenertem den jembidang tangokba noksa nung angur.

Dimapur, Rongjui/Sept. 18 (TYO): Tanü Imkongmeren Sports Complex, Mokokchung nung Indian Swachhata League 2.0 tenzükogo, kong ward 18 nungi ward ketdangsurtem aser volunteers tem dena liasü.

Iba sentong nung o tatsüka jembidang ADC & Administrator, Mokokchung Municipal Council, Chumlamu

Humtsoe-i Mokokchung jila nung aliba nüburtem dang lungjemer Nagaland nung dang masü saka asen linük nung Mokokchung ya temürektiba tesem ka ta sayutsü ayongzuka liasü.

Maparen balala nung lanurtem dak tashi tulu lir, anungji jana-reja den raraba nung Mokokchung jila nung aliba

lanurtem ya nokinketer ama inyaksü pai ayongzük.

Lokti aser nüburtem ajungtsü asoshi lanurtem dang tekolok shisatsü tajung amshitsü pai ajungshia liasü.

Iba sentong nung Changsen Pongen-i Theme Song aten aser ADC & Administrator, MMC aser Captain Team temi anir Swachhata Pledge agia liasü.

Kohima nung National Pension System Diwas mungogo

Kohima, Rongjui/Sept. 18 (TYO): Directorate of Treasuries & Accounts, Kohima nung September 18, 2023 nü National Pension System (NPS) Diwas anogomung munga liasü. Iba anogomung ya Protean E-GOV Technologies Limited den lungjemer ayongzuka liasü.

Commissioner & Secretary, Finance Department, Taliremba-i iba sentong nung jembidang, nisung kati sorkar mapa inyaknubaji talisa mapa nungi anisungzük pension agitsü mechi lir, kong teyari tajung lir, ta ashi.

Nagaland nung Regarding National Pension System tenzükdang maparen ajak teka agi inyaka liasü, saka tangbo system nung temelenshi tulu aruogo aser ajak online nung inyaker, koba terenlok tajung lir, ta pai ashi.

NPS nung DDO's aser Directorate of Treasuries & Accounts nati tongti shilem agir aser department ajunga asoshi NPS nung sentong aika ayongzuka agiogo, aser item nungji tajangzük liasü, ta Taliremba-i ashi.

Backlogs tem agütsüba nung

asaa mesüka department matong-mala liaka itemji mapang shidak nung awajema inyaksü imlar, ta pai ashi.

Joint Director, Directorate of Treasuries & Accounts, Amenla Jamir-i National Pension System indang onük nung jembidang state nung NPS jenjang asadanga liasü.

NPS contributions ya online ajanga eNPS portal nungi yanglur, aser Nagaland state sorkar atema Online PRAN Generation Module (OPGM) amshir, ta lai rateta ashi.

Iba Module nung DDO nungi PRAN generation anguba sülen Treasury office-i Online ajanga PRAN ya yanglur aser state nung NPS mapa kuma amshitsü atema asadangtsü asoshi Oversight Review Committee on NPS tenteta lir, ta lai ashi.

Department ajakibo mapang latetsüba nung parnok indang backlogs tem magütsü, anungji item backlogs agütsütsü asoshi department-i September 25 nungi October 13, 2023 tashi window ka agüja lir, ta lai ashi aser missing/backlog NPS contribution agütsüba mapang tongtipang teinyaktsütem asoshi lai rateta shia liasü.

Missing contributions agütsüba mapang uploaded NPS contributions (challan and annexure) magütsütsü, Directorate ajanga agütsüba format (soft copy nung) agütsütsü aser format print masütsü, magütsüdag PRAN junga jangshitsü lai totuyuba agüja liasü.

Upload asüba mapang PRAN taila aser tiaziü aika putetogo aser iba yongji upload asüba nung menur. Treasury Office ajanga challan number ya eNPS portal nung ita shia anogo 20 tashinung upload asütsüla, ta lai ashi.

Assistant Vice President, Protean E-Governance Ltd, Madhusudan Das ajanga iba sentong nung NPS indang tongmelang agi rateta ashi aser NPS Diwas ya India nung aliba nüburtem asoshi lir ta shia liasü.

Protean ya international sapang nung amshitsü aser international market nung India tenüng nung inyaker, ta pai ashi.

NPS ya senso ajak asoshi tetemsü aser competitive scheme performance lir, kong mapa inyaker temi teyari agitetsü, ta ashi.

(Maneni tapak 6 nung...)



Advisor, Law & Justice, Land Revenue, TN Mannen, IAS (Retd.)-i Law and Justice dak sendakba nung kakat aika Mokokchung Law College indang library nung amshitsü agüja liasü. Noksa nung Advisor TN Mannen den Ao Kaketshir mungdang ketdangpurtem, Mokokchung Law College ketdangsur aser Mokokchung Law Students' Union ketdangpurtem angur.

Mokokchung nung NSAP kübok pensioner dang metetdaksür

Dimapur, Rongjui/Sept. 18 (TYO): Office of the District Welfare Officer, Mokokchung ajanga sangdong ka nung ashiba agi, National Scheme (NSAP) kübok Old Age Pension, Widow Pension aser Disability Pension agir Active Bank Account alir nem 2021-22 (ita trok asoshi) sen pei indang bank account nung inoktsüogo.

Nagaland Rural Bank nung sen ya September 1, 2023 nü inoktsü, Indian Bank nung September 4, 2023, NSCB Ltd nung September 5, 2023, IDBI nung September 6, 2023, Bank of Baroda, Ungma Branch nung September 15, 2023 aser SBI nung September 16, 2023 anogotem inoktsüogo.

NSAP kübok inoperative/ Dormant Bank Account aser state Old Age Pension agirtem nem sen ya September 21, 2023 nü nungi tenzuka office mapang District Welfare Office, Mokokchung nung agütsütsü, ta sangdong ajanga ashi.

Tsükong/yimtsüng/ward telesa nung iba sen yamai agütsütsü: Mokokchung Town atema September 21 & 22, 2023 nung agütsütsü, Ongpangkong atema September 25 & 26, 2023 nung agütsütsü, Asetkong atema September 27, 2023 nü agütsütsü, Langpangkong atema September 29 aser October 3 & 4, 2023 nung agütsütsü, Jangpetkong atema October 5 & 6, 2023 anogotem agütsütsü, Tsurangkong asoshi October 7 & 9, 2023 aser Japukong asoshi October 10 & 11, 2023 anogotem agütsütsü.

Iba teyari agirtem tsüntong marutetra pei aliba tesem nung arogo indang pastor nungi Life Certificate den Pension Payment Book bener tejangja nisung yoktsüla.

Iba dak sendakba nung tali tejangjaba metettsü asoshi Office of the District Welfare Officer, Mokokchung den tongtepratepsüla, ta sangdong ajangasa ashi.

School counselling atema SCERT aser St. Joseph University tsüngta MoU zülutep

Dimapur, Rongjui/Sept. 18 (TYO): School counselling nung lungjemer inyaksü asoshi State Council of Educational Research & Training (SCERT), Nagaland aser St. Joseph University, Dimapur tsüngta Memorandum of Undertaking (MoU) ka September 18, 2023 nü SCERT, Kohima nung zülutepa liasü.

Iba sentong nung jembidang, Director, SCERT, Kevirale-ü Kerhuo-i ashiba agi, 2018 küm Diploma course ka tenzuka liasü aser ibaji ajanga India nung School Counselling nung Diploma course mezung benokba SCERT ji SCERT, Nagaland ya akum aser iba sülen iba course agitsü mapang ya ita trok aliba nungi ita toku akum. Ano State Cabinet ajanga 2023 küm iba course ya küm ka kumtsü.

Iba course indang nükjidong ya tesayurtem nem training agüja aser Nagaland nung aliba government school shia nung trained school counsellor tebur ka aser tetsür ka bosa lidaktsütsü asoshi lir, ta Kerhuo-i ashi.

Diploma course indang mapang talangba kumtsüba ajanga SCERT-i tang aliba curriculum repringshir aser syllabus tasen yangluba mapang lir, ta lai ashi.

SCERT Nagaland-i Naga Indigenous Methods aser Techniques of dealing ya tanü tensa den apet ka kuma lungjemdaksütsü meranger, ta ashi.

School curriculum nung counselling ya tongtipang shilem ka kumdaksütsüla, kechiaser iba ya ajanga terenlok nung kaketshir ajak yaritsü aser parnok indang academic performances nunga tajungba akumtsü, ta lai ashi.

School Counselling Cell, SCERT ajanga tesayur 105 tashi School Counsellor ama training agütsüogo aser ano diploma course atema batch tasen ka tenzüksü, aser ibaji

ajanga tarutsü anogotem Government school tem nem trained School Counsellors tali agütsüba nung yaritsü, ta Director, SCERT Nagaland ajanga ashi.

St. Joseph University ajanga inyakba atema lai pelaba lemsatop aser iba MoU ya ajanga state nung school counselling ya 'professional' kumdaksütsü aser university den lungjemer training tajungba agütsütsü ta ashi.

School counselling ya kanga tongtipang lir, kechiaser iba yagi kaketshir ka 'social, emotional aser academic' tsütsü nungdakba peritsür aser kaketshir takok ngudaktsür, ta Vice Chancellor, St. Joseph University, Chümoukedima, Dr. D. Gnanadurai-i ashi.

School counsellor temi kaketshirtem academic planning, nükjidong ayuba aser azünga nung yarir. Parnoki ano college, technical schools aser vocational training densema secondary education sülena lenmang sayuteter, ta ashi.

Counsellor temi kaketshir nem mental health nung teyari agütsür aser takum yimya aser lenla balala terenlok nung yarir, ta Gnanadurai-isa ashi.

Department of Psychology, St. Joseph University indang HoD, Dr. Wataro Longkumer-i ashiba agi, SCERT aser University lungjema yagi shisatsü aser osangtsüsang melentepba nunga tashi itshitsü.

Iba ya ajanga School Counsellor nem University ajanga training agütsütsü, University ajanga SCERT nung inyaker nem counselling tsütsü training aser workshop agütsütettsü, ta lai ashi.

Iba sentong nung menden ya Professor aser Head, Guidance & Counselling Cell, Dr. Zavise Rume liasü aser Reader, SCERT, Medemmongla Jamir-i melepzung o jembiba sülen SCERT aser St. Joseph University tsüngta MoU ya zülutepa liasü.



September 18, 2023 nü New Delhi nung Congress MP tem- Sonia Gandhi, Rahul Gandhi aser Adhir Ranjan Chowdhury nunger den J&K National Conference MP, Farooq Abdullah nunger Lok Sabha senden nung adenba noksa nung angur.

PM asoba anogomong nungtem nung yimsü lenirtemi azü tenlaogo

Chandigarh, September 18 (Agencies): Ato kilonser, Narendra Modi arrshi küm 73 ajungba anogomong nungtem nung Hombarnü Chandigarh University nung Chancellor aser Chandigarh Welfare Trust (CWT) tentetsang, Satnam Singh Sandhu leniba nung yimsü balala nungi lenirtemi Chandigarh nung aliba Lakshmi Bai Mahila Bhawan nung azü tenla agütsü. Muslim, Hindu, Sikh, Khristan, Buddhist, Jain aser Parsi lenirtemi azü tenla agütsüba den külemi linük nung telongjem alitsü aser yimsü

balala amangertem ajak tesünep nung alitsü ayongzük. Azü tenla agütsürtem rongnung IMF Convenor aser CWT tentetsang, Satnam Singh Sandhu; Acharya Muni Mission tentetsang Lokesh Muni, Sanatan Dharma Mandir nung tongti putir Acharya Om Prakash, Chandigarh Diocese Church of North India (CNI) nung Bishop Denzel Peoples aser Sufi Sant Ghulam Haider Kadri nunger densema liasü. Yamaji tamangba yimsü balala nungi züngsemtemi azü unit 150 tenla agütsü.

Iba sentong nung jembidang Chandigarh Welfare Trust tentetsang, Satnam Singh Sandhu-i, "India nunger tashi tulutibaji secular lir aser akhidang nungi India nunger sobaliba nung yimsü balala amanger ajak tesünep nung litetba ya lir. Tanü azü tenlaba camp agiba ya ajanga India nung yimsü balala amanger ajak tesünep nung litetba temaitsü sayur," ta metetdaksü. Kasa sentong nung Acharya Om Prakash, Lokesh Muni aser Sufi Sant Ghulam Haider Kadri nungeria o jembia liasü.

Gujarat kübok Bharuch district nung NDRF-i nisung 105 kümzük

Bharuch, September 18 (Agencies): Gujarat state nung tzunglu maneni aruba ajanga tesem aika nung tzumetsung agi nüburtem kongshiogo; talisa Bharuch district nungbo gari lenmang aika shibangogo aser National Disaster Response Force (NDRF)-i nisung 105 kümzükogo. Hombarnü district administration-i Narmada ayong tepdanga yangluba apu lenmang shibangtsü tuyu aser Bharuch o Ankleshwar na tsungda ainlen senzürtem dang National Highway 48 lenmang ajangadang senzütsü metetdaksü. Ankleshwar nunga ano maneni gari lenmang aika shibangogo. State nung NDR-i maneni

kümzükba mapa inyakdar aser tang tashi nung parnoki Bharuch district, talisa Nikora yimdak nungi nisung 105 kümzükogo. NDRF aser civil administration senteper ali nemzuka aliba tesemtem nung alir aika tanga tesem nung jenokdaksüogo. Ano külen Narmada district administration-i yimtsung aika nung tzumetsung aliba ajanga September 18 nü schools aser colleges shibangdakja liasü. Namrada tzü-tepdang nungi tzü chiokba ajanga yim aika tzü agi metsungbangogo. Iba dak alia Ukai, Damanganga, Kadana aser Bhadar densema tzü-tepdang 10 nunga tzü tali mobangogo.

Gujarat nung tzunglu shilem 90.8 aruadokogo. Kutch aser Saurashtra region na nungbo tzunglu shilem 137 aser shilem 111 aruadokogo. South, east-central aser north Gujarat nung tzunglu shilem 85, shilem 83 aser shilem 76 aruogo, ta State Emergency Operation Centre (SEOC)-i metetdaksü. India Meteorological Department (IMD)-i September 20 tashi ano maneni state tesem aika nung tzunglu arutsü, ta tekümdangtsü metetdaksüogo. IMD-isa, talisa Ahmedabad, Kheda, Panchmahal, Surendranagar aser Kutch nung tzunglu sashia arutsü, ta metetdaksü.

Kharge-i Parliament nung Women Reservation Bill benoktsü akhanger

New Delhi, September 18 (Agencies): Hombarnü Congress party-i sorkar dang Parliament nung Women Reservation Bill benoktsü atema akhangba den külemi, linük nung mapa manguba tebilemstü tuba dang akümba ya ajanga linük nung democracy samatsütsü, ta metetdaksü. Parliament nung 'Parliamentary Journey of 75 years Starting from Samvidhan Sabha - Achievements, Experiences, Memories And Learnings' onük nung ajemdaker jembidang Congress Tir, Mallikarjun Kharge-i, "Women Reservation Bill benoktsüla. Iba onük atema nai (Chairman) ola adokra parnoki agizüktsü," ta ashi. Kharge-isa, Parliament nung tetsürtem züngsem ishika dang lir; Parliament House anaprongla senteper tetsürtem

zungsem shilem 14 dang lir aser state legislative assemblies nungbo tetsürtem shilem 10 dang lir, ta metetdaksü. 1952 küm mezüingbuba Lok Sabha nung tetsür MP temji shilem 5 dang liasü, ta pai ashi. Kharge-i, US Parliament nung tetsürtem züngsem shilem 2 dang aliba tangbo shilem 28 kümogo aser UK Parliament nunga tetsür züngsem shilem 3 dang aliba nungi tangbo tetsür MP tem shilem 33 kümogo, ta metetdaksü. JD(U) nungi Ram Nath Thakur-ia Parliament building tasenba nung women reservation bill benoktsü takhangba agütsü. Kharge-isa, tang linük nung zünger mapa mangur lanur crore 8 lir, aser mapa manguba tebilemstü ya tuba dang kümra linük nung democracy samatsü, ta ashi.

Parliament building tasenba nung tongti telemtetba aika agütsü: PM



September 18, 2023 nü New Delhi nung Parliament senden mezung anogo nung Ato kilonser Narendra Modi-i Parliament kima osangbenertem den jembiba noksa nung angur. Kasa noksa nung Union Minister tem- Pralhad Joshi, Arjun Ram Meghwal aser V Muraleedharan nungera angur.

New Delhi, September 18 (Agencies): Hombarnü Lok Sabha aser Rajya Sabha senden tembangba sülen Parliament building tejenba shibangogo aser Mongolbar nungi tenzuka Parliament senden anogo pezüji Parliament Building tasenba nung agütsü. Parliament Complex tejenba ya küm 70 dak tema 'democracy tekülem ki' liasü, ajisüaka tangbo iba ya nüngo kiojen ka dang akümtsü aser Parliament building tasenba nung ang senden amentsü.

jembiba onüktem bilemteta liasü. Ato kilonser Modi-isa, Parliament building tasenba nung puti otsü asütsüsa tongtibang telemtetba aika agütsü, ta metetdaksü. Tesülen Lok Sabha senden thinen aser Mongolbarnü nikongdang 1:15 ako nungi Parliament Building tasenba nung senden tenzüktsü; Rajya Sabha nunga senden thinen aser Mongolbarnü nikongdang 2:15 ako nungi Parliament Building tasenba nung senden tenzüktsü. Mongolbarnü Parliament senden medenzükdang House anaprongla nungi MP tem ajak lokti noksa tangoktsü.

Parliament Complex tasenba ya taküm küm tetenzüklen Ato kilonser, Narendra Modi-i semzükja liasü. Parliament senden temeja ayongzuka aliba nung Women's Reservation Bill benoka agizüktsü atema party aikati takhangba agütsüdar. Iba bill ya mezüing 2008 küm benoka liasü. Modi leniba nung MP temi parliament building tejenba nem akhüm agütsü aser Modi-i Parliament nung mezüing Ato kilonser Pandit Jawaharlal Nehru-i "Tryst with destiny" onük jembiba aser taoba mapang BJP lenir aser Ato kilonser Atal Bihari Vajpayee-i

Lokti noksa tangokba sülen MP temi Parliament nem akhüm agütsüba sentong ka nung adentsü aser 2047 küm tashi nungbo India ya terenlok aliba linük ka akümtsü atema bangzüngtsü. Sorkari ayongzükba Parliament temeja senden nung Modi sorkari Women's Reservation Bill, uniform civil code (UCC), 'one nation, one election' aser General elections kera agütsü atema benoktsüa akok, ta aikati bilemer.



September 18, 2023 nü New Delhi nung Odisha Chief Minister, Naveen Patnaik aser BJP lenir Vasundhara Raje na Patnaik aianu aser kaketzülur, Gita Mehta asüpila sentong nung adenba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI (SEPTEMBER) 19, 2023

Mapa inyaker meinyakma lir

Asen lima nung tazüngertema aser mazüngertema mapa teinyaktsü kecha maka amato tsüraburtem nem mesüdakja kazüa senzür aika lir. Iba jagi asen lima nung, talisa, zünger mapa manguba tebilemstü indang kanga süoki ia jembir. Atangji, kaketreju nung junga mezüngtet züngtur anenertem dang nungibo zünger mapa mangurtemjiang takoksa tuluba, kechiyong parnok azüngdang mapang aser senotsü endokba ajak amajok akümer. Ajisüaka, zünger mapa manguba tebilemstü indangji kodang jungjunga bilemdangdir, aji shitakba tebilemstü masü saka peisasa yangluba taila tebilemstü asütsü, kechiyong alima nungbo mapa makaba lima aser tesem kecha nunga mali. Aji oda, koba lima nung südirsüaka tazüngertema tazünger yari aser mazüngertema mazüngba yari inyaktsüsa mapa nangdaka lir, anungji mapa meinyak kazürtemji mapa makaba agi masü saka peisasa mapa manguba mesüra meinyaknuba agi asütsü. Nisungi angatetsübaji mapai nisung bushia arur masü saka nisungi mapa bushia aoer aser inyaker. Kasaji, mapai nisung yanglur masü saka nisungiang mapa yanglur aser taküm piyong item mapatemji inyaka alir. Aji oda, mapa inyakba agiang taküm aliba jangjar mesüra taküm aliyonga mapa meinyakra tasü den kasa. Atangji, zünger mapa manguba timtem aser taiji mapa meinyak kazürtem dak masü saka kaketreju nung parnok dang sayuba sayuyim dak keta alitsüa akok, kechiyong akhidang nungi tanü tashi asen lima nung azüngba aser sayubatem ya mapa inyaktsü sayur masü saka mapa meinyak ser government ita sen chia alitsü bilemdakja sayur amai sayur. Ibayongji, tazüngdangyongi government ita sen chia alitsü tebilemba aser nükjilding yur azünger. Tanü asen lima nung government tenzükertem aikati pei mapaji nübortem tenzükba mapa ta mangateti ita sen asoshi dang inyaker amai inyakbaji kaketreju nung angazükba shisatsü aser tai tangatetba lir. Aji oda, asenok aika government mapai aibaji mapa inyakba yari ita sen angutsü asoshi masü saka ita sen chia alitsü asoshi government mapai aier. Mapa inyakba agi taa anguba o taa angutsü asoshi mapa inyakba na tsüngda tepila talangka lir. Iba tangatetba tasen nung asenok kaketreju nung tanü putu aser asen lima aser nübortem dak apet asenoka asenok meyong sayuyim yanglua kaketrejutem nung sayu tenzüksübaji kanga rongdak nüngdak kümogo. Joko, tanü putu yabo otsü azüngtsüba putu masü saka alima nung dang masü saka anüngdak aser tzüim telong nung alibatem indang dena bushidena nübortem atema tagitsü kuma yanglur agütsütsü merangtepba putu lir, anungji kaketreju nung tanurtem dang zülutsü aser azüngtsü sayurbo joko mapa inyaktsü sayur. Iba jagi kaketreju nung tanurtemi parnok tila asüdangyongi kaketshisatsü bushiba ya mapa meinyak ayongayonga kazütsü asoshi masü saka mapa mazüngi inyaka alitsü asoshi temetetba shisatsü bushir ta angatetter. Aji oda, tanurtemi kodang kaketshisatsü bushiba nükjildingji angateter, tazüngertemi dang masü saka züngtor anertemi dena mapa inyaktsü. Atangji, asenoki bilemer dang ashi, alima nung item mapatem yabo tetsürtemi dang inyaktsüla mesüra züngtur-züngartemi dang inyaktsüla ta mali, kechi mapa südirsüaka mapaibo nisung mashishir. Aji oda, mazüngertem dang nungibo tazüngertemiang alu tajungba yimtetsü, kechiyong parnok dak tashitemetet lir. Kasaji, teka mapatema mazüngertem dang nungi tazüngertemi dang tajungba aser tuluba inyaktetsü. Iba tangatetba nung kodang asenoki asen alidak nüngdak mapatem reprangteta inyak tenzükdir, anogo shia asenoki mapa inyaker meinyakma angutsü. Aji oda, anogo shia mapa meinyakma aser merenem toktsür mejangtsü. Atangji, asenok aika mapa inyaknyonga mapa mereprangtet aser mapitetba agi mapa meinyak pi nem mesüdakja amonger asütsüa akok. Ajisüaka, kodang asenoki asen den külem alir tsümartemi inyakba mapatemji reprangdangdir, item mapatem rongnung asenoki inyaktetsüla aika lir, anungji aseni item mapatemji danga inyak tenzüksüla. Mapa inyak tenzüksübaji, tulubalen nungi masü tilabalen nungi tenzükter ta asenoki angatetdi.

OLEMSABANG

MISSION TO THE NAGAS ASER OKADAK AROGO OTSÜ TEMETEN BUSHIBA

~ Walu Walling & Wati Longchar

(Yashi adok nungi...)

Arogo Okadaki aotsü asü masü?

Kari Arogo okadaki aotsüla, kari maotsüla aser Lai tesayuba masü ta jembir. Pastortem aser tesayur aikati courti aotsü/maotsü Lai tesayuba rateta ashi. Pastor kati courti maotsüba küli asem agutsü: (1) Secular court is not likely to be sensitive to Christian values (2) The basis for going to court is often revenge and this should never be Christian's motive (3) Lawsuits make the church look bad, causing unbelievers to focus on its problem rather than on its purpose. Ano tesayur kati yamai ashi, "As a true believer of Christ secular court is not our judgement platform, and therefore I strongly stand that we should never go to court." Matt. 5:25-26 nung Yisui courti moi mangatetep ajak tangatetep kati aruadokang ta kanga junga shia lir. Yamaji küli aika aguja sensaksem aka.

Ano karibo aotsü tim ta shisem. Lenir kati yamai ashi, "Aor Khristantemi tamanger ka pei temeden asoshi alima okadaki aobaji tai ta bilema jembir. Koba tetezü alima okadaki aobaji temenen (mojing sabang ama bilemer)! Alima okadak sabangi aobaji temenen süra okatsürtemjia (lawyer) temenen asü? Reverend aser Sannüker chirtem karbo law azünger/lawyer ali asü mali, lira aji temenen asü? Asenoki tali angajemtsü asoshi asen atepzüng nung atalokba küli kar shisadangdi: Küm ishika süiaogo lanur meyirjang tema tesayur interview nung takok ngur Government-i mapa magütsüba anema okadak ken-o benoka takok angubato tai asü? Küm ana-asek ka jakdang Sannüker ishika Holy Land tour aotsü lenmang bushiba nung yariteper nisung kati sen chitsür mapa mekümtetsüba asoshi alima okadak ken-o benoka temeten angubato-a tai asü? Kodang India lima nung State kar nung Anti-Conversion Law passed asü iba lemtet ozüng anema tamangertemi pei temeden jembitsü Court nung ken-o benokba ya shitak asü tai? Kechi keno südir süang, kija-a süang, lokti-a süang alima okadaki aotsü aser aoba kecha lemsa-a mali, ajakji pei temeden jembitsü aor dang. Laishiba nunga alima okadaki aoba aitsüba mali ama bilemer. Kokra maodang yimjung yanglu tajungba ta tesayubabo angateter saka koda mesüra aobaji tai masü (Mathi 5:25-26; 18:15-17). Tejen Lai putu nung obendanger Deborai Israel nung mangatetep mapang okadak obendangba angutsü (Obendangertem 4:5). Solomon Chubai tetsür ana tanür mechi mangatetep mapang okadak o bendangba angutsü (1 Chubatem 3:16-28). Mosai okadak koda shilem agitsü iba indang Israel nung den jembiba Tazüngkünem 25:1-3 nung angutsü. Iba dak sendakba küli Laishiba nung aika angutsü. Sura tanü Molungyimseni Ao Naga Baptist Arogo Otsü temeden jembitsü alima okadaki aoba ya kangasa tai asü?" Yamajiaika jembia arur, Pastor kati "Arogo courti aoba nung aitsütsü maitsütsüji shir ajanga aor iba dakji aket. Alima lokti, pangdak den ken-oadokra court ajangang bendanglanglang. Saka arogo o arogo na tsüngda, mungdang o arogo na tsüngda atema otembangtsüji Laishiba ta amangba telokji asenok Baptist ya lir."

Koba küm aser kong Naga tenem nung arogo tenzük?

Sensaksemer ajaki December 22, 1872 nung Molungkimongi Clark atua tamangertem parnok 15 tzüsenja aser Kibuba Benjong kaa arogo tenzük. Ibaji Naga tenem nung mezüngbuba arogo kimongji lir. Iba historical factji melenshitsü makok. Koba 1872 küm December 22 Clarki Molungkimong yimtak tzüsenja, temeshi Kibuba Benjong aka ibaji Naga tenem nung arogo kimong aser "First Baptist Church in Naga soil" ta historian ajaki ashir aser yamaji tanü tashi Molungkimong nung tzüsen tzübo aser sentep ki kimong lir. Molungkimong yim mesamai tanü tashi tamanger telok lir. 1872 küm aser anogo nungji ajemdaker Naga nung aser ABAM jubilee monga arur. 1872 kumarogo tenzükba ya Molungkimong litsü nung atalok. Missionary record, arogo otsü balala, tebangi shia aruba otsü ajak agimezüng arogo tenzükbaji Dekhaimong aser iba historical fact ta tejangja ta shisa lemsateper ajaki shisem.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Auburn University nung kaketshir 200 dak tema baptiogo



September 12 ayaterm nung Auburn University nungi kaketshirtem Red Barn nung aliba awatsüing nung baptiba mapang tangokba noksa nung angur.

September 18, 2023: United States tesem balala nung aliba college tem nung Tsüngremi maneni mapa inyakdar; taküm küm tetenzüklen Asbury University, Lee University aser Samford University nung asentenshi milak jangruba sülen taoba hopta Auburn University nunga Tsüngremi mapa inyaka kaketshir aika baptiogo.

Mongolbar (September 12) aonung Auburn University nungi kaketshirtem meyrjang ka shi Neville Arena nung adenshia tekülem sentong nung aden. Iba sentong nungji kaketshirtem rongnung kati tzü nung baptitsü melungtetba sülen maneni kaketshir aikati Yisu Khrista agizüka tzü nung baptitsü melungteta liasü.

Auburn University nung tesayur, Michael Floyd-i, "Ni Auburn basketball team-i Kentucky akokba nguogo. Ni Auburn football team-i Alabama akokba nguogo, ajisüaka Mongolbar aonung

atalokba ama ni kodanga agitsüsa tzü maliba agi onok nisung meyrjang aika Red Barn nung aliba awatsüing ao.

Unite Auburn indang "Night of Worship" sentong nungji nisung 5,000 shi aden. Iba sentong nungji New York Times Best Selling Author, Jennie Allen aser Pastor Jonathan Pokluda nati Tsüngrem O jembia aser Passion Music-i tekülem aser tetushi ania liasü.

Jennie Allen-i Instagram ajanga, "Iba sentong tatembanglen ni kaketshirtem dang, nenoki tzü nung baptiner asü, ta asüngdangtsü apiteta liasü. Ni o jembiba sülen sabang nungi alur lia kaketshir kati text message ajanga pastor dang parnoki tzü nung baptiner, ta metetdakja liasü. Anungji ni tanaben sabangi atu aser lokti dang, nenok kari dangi Khrista agizüka baptiner asü? ta ni asüngdang," ta metetdaksü.

"Nisung ter dak temai teka mekanga liasü iba sülen ano aikati baptitsü teletmetba agi. Ajisüaka baptiba sentong

agitsüsa tzü maliba agi onok nisung meyrjang aika Red Barn nung aliba awatsüing ao. Loktii awatsüingji longbanga nokdak aser onok nisung 6-10 shii kaketshirtem tzü nung baptitsü," ta Allen-i metetdaksü.

"Ayaterm tashi lokti jagi awatsüingji longbanga nokdak aser aikati taküm küli lemsatepba den sarasadema liasü. Tsüngremi mapa inyakdar, aser iba ya manentsü," ta Allen-i ashi.

Auburn University nung kaketshir aser journalist, Kristen Carr-i, "Kü taküm nung ni iba ama ya kodanga majangshidang," ta ashi.

Laisa X ajanga, "Taonung yangi Auburn nung revival atalokdar. Nisung jenti Red Barn nung baptidar aser noklang aikati pelaa agizükdar. Taonung Neville Arena nung 'Unite' ta ser sentong ka agiba sülen baptiba sentong agi. Iba lemsatepa liasü.

Libya linük atema Christian Aid teloki teyari meshir

September 18, 2023: Khristan melungtet telok-Christian Aid-i tawa Libya nung tzümetsüing lendong agi kongshiba nüburttem yaritsü atema tayongzükba agütsüogo.

Yipru ajanga tzü-tepdang (dam) ana pokdangba ajanga anüdoklen Derna yimti nung tzümetsüing lendong tulu ataloka nisung 8,000 shi süogo. Tzümetsüing ajanga Benghazi, Cyrene, Al-Bayda aser Al-Marji yimtitema kongshi.

Christian Aid teloki Denmark nunger melungtet telok Dan Church Aid (DCA) den senteper 2011 küm nungi Libya nung amenoker teyari balala agütsür. Yamaji tang parnoki Derna nung medical teyari agütsüba den külemi Benghazi nung ki malirtem nem tejenokdak agütsür.

DCA-ia tzümetsüing lendong agi kongshibapurttem

nem blankets, bedding, sapon, shampoo aser towels lema agütsür. Tarutsü nung DCA-i senotsü teyari-a agütsütsü.

Christian Aid indang Humanitarian Division nung tongti, Michael Mosselmans-i, "Libya nung tatalokbatemji reprangdangra temelung raksatsüsa lir. Tzümetsüing ajanga hospitals aser ki aika ponger oadokogo. Nisung aika tzü tajemtsü mali aser tashidak balala poktetba nungi kümzüktsüsa merükmejuba osettem mali," ta metetdaksü.

"Anungji Christian Aid-i onok indang partner Dan Church Aid den senteper maneni timtebapurttem nem teyari agütsütsü atema onok yaritsü mepishir. Sarasadem ajak, osettsüset sempet ajak aser mapa balala ajanga lendong agi kongshia alirtem nem teimla agütsütsü. Parnok

tanaben asentenshir taküm yangershitsü atema onok den senteper teyari agütsütsü ayongzükker," ta paisa metetdaksü.

"Nai pound sen 25 tenla agütsüba ajanga 'humanitarian response kit' ka alitetsü. Iba dak alia nai blankets, bedding, sapon, shampoo, toothbrush, toothpaste, sanitary towels, baby wipes, napkins aser tzü bottle tenla agütsütsü akok," ta Christian Aid-isa metetdaksü.

Unity Government health ministry undersecretary Saadeddin Abdul Wakil-i, hospital tem nung tasü mang ayuba tesem ajak süngadokogo, ta metetdaksü.

Tzümetsüing agi Derna yimti metsüingba sülen nisung 30,000 dak tema talidak makai kümogo, ta Libya nung International Organisation for Migration (IOM)-i metetdaksüogo.

ANOGO ABEN TSÜNGREM DEN

Tanela Telungjem

T. Ken 133:1-3

"Ajiang, adianutem külemi telungjem nung alitsü koda tajung aser jangratemtsü!" (t.1). Iba ken züluba mapang nung nungdakba ama tanüa kasaji nungdaker. Asenoki adianu aser ayianu külemi telungjem nung alitsü bilemer. Parnoki kasa yimya lemsateper kechiaser parnok tsürabur kasa. Ki toktsür mao tashi, parnok kasa ki nung alir aser kasa langbang nung chiyonger.

Ano, Tsüngremer nüburttem külemi telungjem nung alitsü asenoki yimlar- saka temesüktep masü. Kinungpu aser kinungtsü mesüktepa masür. Tanurtem kibong nung kwi lidir, parnok mesüktepa masür. Kasa tsüraburi asoba tanurtem mesüktepa malitsü, saka parnok ajakji kibong nungi, kibong ka meyong lir. Yamaji Tsüngremia Pa chirtem rongnung temesüktep meimlar; Pai telungjem aginer.

Ken züluri tanelaren telungjem ana terasa asenok nem agütsür. "Ibai tekolok nung senti totzü alokba, koba bangsemu manung, oda Aaron bangsemu yanga aluba mesüka lir" (t.2). Aaron teku manung lung terana aketba teku semoksü asem-lung shiaji Israel kin ka temaitsü. Item lung ajak manung totzü yanga alu aser totzü mezüba nung parnok ajak ka aküm. Ibaji Tsüngrem Tanela Temeshi noksa lir, shibai Yisu Khrista temang nung asenok baptitsür aser tanelaren asenok lungjemdaksür. Telungjemji langka asenoki yangluba masü; ibai Tsüngremi langka asenok nem agütsüba lir.

Tanelaren telungjem tejang atangba azüngtsü ama lir. "Hermon tenem nung azüngtsü ama lir" (t.3).

Tenem azüngtsü den Tsüngremer temoatsü arur. Asenoki tanela telungjem nung alitsüla. Na a telungjem nung shilem ka asütsü Tsüngrem dang asüngdangang, tebilemstü shilem ka masü.

Khrista temang nung shilem ka ama Khristan telungjem asoshi na ne shilem inyaksüla. Tanela Temeshi adianutem den telungjem nung alitsü yarir. Terunem totzü aser tanelaren azüngtsü ne taküm nung alitsü sarasademang.

UP nung anti-conversion ozüing kübok Khristan 17 puogo

September 18, 2023: September 17, 2023 nü Uttar Pradesh nung anti-conversion ozüing kübok tetsür tenet densema Khristan 17 puogo.

Amongnü Khristantem tekülem sentong agiba mapang yimdaklir kati police nem tashishiba metetdaksüba sülen police-i Khristantemji apu.

Charity telok-Unity In Compassion nung General Secretary, Minakshi Singh-i, "Khristantem anema tai tongloksüba nungji tajemdakdak kecha mali," ta ashi.

Minakshi Singh-isa Khristantem sarasademba mapang nung police-i apuba atema police aija, "Iba ya linük temzüing alema lir, kechiyong linük temzüing ajanga tamangba yimsü benshitsü atema senso ajak nem temeden agüja lir," ta ashi.

September 18 nü osangbener den jembidang lai, "Onoki parnok bail nung chioksü atema local court nung temepishiba agütsütsü,"

Yimdaklir, Subhash Chandra Jatav-i police dang, Dinesh Chandrashekar-i tekülem sentong nung adentsü atema par kidangi jaoka liasü, ta metetdaksü.

Subhash den pa kinungtsü aser medemer kar Chandrashekar'er kidang ayongzükba tekülem sentong nungji aden.

Subhash-i, sentong ayongzükertem jagi Khristan ka akümstüji kanga tongtibang, ta jembia aser Chandrashekar den tangartemi Khristan yimsü dangi meyipra sen agütsütsü ta parnok mesüzük, ta police nem metetdakja liasü.

Singh-i, "Iba sentong nungji shinga yimsü memeyip mesüra shingia yimsü meyipdaksütsü memerang," ta ashi.

Khristantem anema ken o benoktsü nükjidong nung Subhash den tangartem jagi sarasadem sentong nung aden asütsüa akok, ta onoki melung nung temepishiba agütsütsü," malemer, ta Singh-i ashi.

AO OSHI ANGAZÜKDAK:
TANÜ ANGAZÜKTSÜBA OJANG



Salasashi

(adj) ajung majung asadanga bilemdangba (thoughtful exercise)

*Mungdang nung **salasashi** junga agir dang lenirtemi jembir.

Salazük

(v) alena aliba agizük (let loose, untie).

* Nashi chanu alena aliba lai **salazük**.

OLONG PAITEP # 6641

	1	2		3	4	5
6					7	
			8	9		
		10				
11						
			12			
13	14	15				16
17					18	

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S ____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ___ hi - (3)
- 16. Akümüli nungi pilar - (3)

OLONG PAITEP # 6640 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Ethiopia tsür Gudaf Tsegay-i Deobarnü women's 5,000 metres world record yanglutetogo. Eugene Diamond League finale nung Gudaf Tsegay-i 14:00.21 seconds nung 5,000 metres asemteta otsü tasen yanglutetogo. Laisa tarutsü nung minute 14 majungdang iba otsü yanglutsü alizüing aliba osang metetdaksüogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tepela Tasoba Anogo



Kohima nung National...

(TAPAK 2 NUNGI...)

Principal Director, Directorate of Treasuries & Accounts, R.N Yanthan-i iba sentong nung tarur pela agizükba o jembidang, iba sentong ya Nagaland nungbo tang mezüingbuba agir aser India nung aliba state tem nung melentepa agir, ta ashi.

Nagaland nung January 1, 2010 nungi NPS tenzükba indang pai tongmelang agi rateta shia liasü.

Ramesh Kumar, Senior Lead (Government Relation) Protean E-Governance Ltd ajanga NPS terenlok tasen indang osang agütsü aser iba sentong tempangba sülen Go Green Initiative kübok süngtong tema liasü.

MOLUNGNEN O



20.08.1968 - 13.09. 2023

Asür **Mr. Jongpongchiba Longkumer** (Asangma) mapang tatsüka shirangba mapang nungi tasüba anogo tashi adianu, tembar, kiyonger, Arogo, lokti tentet balala aser kija kibong shirnokisa ozü asüko mangyim nung nübu, rongsen, shisatsü aser sarasadem ajanga nungita yariogo, nenok ajak dang tepela tulu lemsateper.

Tulusang Tsüngremi nenok ajak maneni moajang ta ozü tamang sarasadem.

- *Temeim Kinüngtsü, Jalatem aser Kinüngertem.*

**CENTRAL BUREAU OF COMMUNICATION
MINISTRY OF INFORMATION & BROADCASTING
GOVERNMENT OF INDIA**

Central Bureau of Communication kübok Private Registered Troupes aser Individual Artistes registration/ empanelment atema re-advertisement

Central Bureau of Communication (CBC) ajanga Manipur, Mizoram, Nagaland, Assam, Sikkim, Tripura, Odisha, Maharashtra, Goa, Dadar & Nagar Haveli UT, Kerala, Lakshadweep Island, Himachal Pradesh, Jammu & Kashmir UT & Ladakh UT, Andhra Pradesh aser NCT of Delhi State nungi Drama, Nukkad Natak, Dance-Drama, Composite Programmes, Folk and Traditional Recitals, Magic, Mythological Recitals, Puppetries etc Private Registered Troupes aser Individual Artistes küm asem (03) atema Zonal/Regional Offices, Trivandrum, Bhubaneswar, Guwahati, Imphal, Pune, Chandigarh, Jammu, Vijayawada aser New Delhi (HQ) kübok registration/ empanelment asütsü application meshir.

Tanga osangtem- application format aser eligibility conditions metettsü atema Central Bureau of Communication website: www.davp.nic.in mesüra www.cbccindia.gov.in semdangdang.

Application agitsüba tatembang anogoji October 10, 2023 asütsü.

**Joint Director (Programme)
Central Bureau of Communication,
New Delhi (HQ)**



CBC 22204/11/0004/2324

Mezüingbuba Nagaland Theatre Festival takok ngua mongogo



Dimapur, September 18, 2023 (TYO): September 15 nungi 16 tashi RCEMPA, Jotsoma nung mezüingbuba Nagaland Theatre Festival mongogo.

Iba sentong ya TaFMA-i Hill Theatre, Nagaland den yaritepa ayongzük.

Benjung tenzükba anogo nung Sentilong Ozukum-i züluba 'The Case of Longti Village' stage adaptation sayua liasü.

Iba saya ya Bendang Walling-i direst asü aser Nagaland nung sen aginüba aser ochimashi ajanga ozüing alema nakmati atuba aser alima raksaba indang sayu. Bendang

Walling ya National School of Drama nung azüingba nisung ka lir.

Iba saya nung NSD Tripura nung azünger Kilangtemsu Imsong-i Assistant Director ama shilem agi. Maneni NEZCC Young Talented Artist Award angur Limanungdang aser National School of Drama nung azünger V Uto Chishi nati set design asü.

Iba saya atema make-up artist ji Caroline Sangtam liasü aser Imchatsung & Anungla Zoe nati design asüba süoshitem agi.

September 16 nü anogo piyong theatre workshop ka agi aser iba nung Bendang Walling,

Uto Chishi, Kilangtemsu Imsong aser Limanungdang nungeri tesayuba balala agütsü.

Iba workshop nung nisung 52 tashi aden aser parnok rongnung Patkai Christian College, Sazolie College aser Kohima College kaketshirtem dena liasü.

TaFMA-i Hill Theatre den yaritepa ayongzükba benjung ya Nagaland nung theatre arts ajungkettsü atema liasü. Mezüingbuba Nagaland Theatre Festival kanga takok ngua mongogo.

Theatre play nung host ji Dr.Theyiesinuo Keditsu liasü aser benjung nung LC Sekhose-i co-ordinator ama yaritep.

Taiwan-i China dang tanen makai rara mesüba anentsü ajungshi

Taipei, Rongjui/Sept. 18 (Agencies): China mitkar indang tayimtsü 100 dak tema Taiwan asetkong anasa arua senzüba putetba sülen Taiwan-i China dang "military harassment" anentsü ashi.

Deobarnü nungi tenzüka fighter jets densema China mitkar indang tayimtsü 103 tzüym anasa senzüba putetogo, ta ministry ajanga ashi. Parnokisa navy ships toku putetba ashi.

Tesüiba ghonda 24 tsüingta China nung inyaksangshiba nungya tayimtsü 40 tashi Taiwan Strait indang median line alema aru. Iba median line ya China aser Taiwan tsüingta 'unofficial barrier' ka ama amshia arur saka küm ka tejakdang nungi China-i teti alema arur.

Tayimtsü kar Taiwan south tsütsü Bashi Channel ajanga ao, koba iba asetkong ya Philippines den arütsü ka amai lir.

Beijing-i democracy yimya nung yimsü asüba Taiwan ya par litsü ama jembir aser par nukjidong atongtsü asoshi tashiyim mamshitsü ta shia mali.

China-i tesüiba anogotem inyaksangshiba nung strait aser

region nung security asoshi tayongzüka tulu lir, ta ministry ajanga ashi.

Taiwan Strait nung yimjung aser tesunep nung alitsü ya region nung telok ajak teinyaktsü lir, ta ashi.

"Communist military-i tanen makai mitkar tashi amshia merenshiba ajanga regional security tensa tamajungba akumtsü. Anungji China-i iba ama teraksa mapa tangsa anentsüla," ta ashi.

China nung inyaksangshiba ya international airspace nung lir, anungji international law kübok aibelen masü, saka Taiwan tsüpodaktsütsü tebilemba nung inyaker, ta United States defence department nung taoba mapang China, Taiwan aser Mongolia atema senior director Tony Hu-i ashi.

Taiwan nungi telangzüba agütsütsü ama Beijing-i imla alitsü akok, saka yamaji mataloktsü südi, ta pai ashi.

Air force ajanga hopta tatemlen operations agiba den taoba hopta Chinese navy aser Shandong aircraft carrier densema western Pacific nung

exercises agiba Taiwan-i puteta liasü.

Japan indang defence ministry-ia par navy temi frigates, destroyers, fast combat support rong ka aser Shandong densema China nung rong trok Taiwan anüdoklen aliba Miyakojima Island south tsütsü kilometre 650 shi pilar tzüym ajanga aoba putet, ta ashi.

Shandong nungi jets aser helicopter tem aoba aser arua anenba putet, ta parnoki ashi.

Yimya agi tzükumlen Chinese military drills asoshi July nungi September tashi ya mazüngtiba mapang lir, ta Taiwan indang defence ministry ajanga taoba hopta shia liasü.

Tang tesüsa drills agiba atema China-i sangdong kecha agüja mali.

April ita Taiwan Tir Tsai Ingwen ya California nung US House of Representatives Speaker Kevin McCarthy ajurutsü aoba sülen Beijing-i iba asetkong ya lungbanger ama military exercise agia liasü. Ano McCarthy sülen pa melener Nancy Pelosi-i August 2022 nung Taiwan semdangba sülena drills sentong tuluka agia liasü.

Iran aser US tsüingta tepuokdak alirtem melenteper

Tehran, Rongjui/September 18 (Agencies): United States den tepuokertem melenteptsü asoshi nangzüktepba ama Iran-i America nung tepuoker pongu chioka parnok Qatar yimtiba Doha-i aotsü atema Tehran indang airport-i anirogo.

America nung pongu rongnung pezübo tenangzüktepba nung shilem ka ama taoba ita house arrest nung toktsü aser pongububa ya-a taoba mapang house arrest nung toktsüogo.

Hombarnü inyakyim ajanga taoba ita tepuokertem chioktsü asoshi nangzüktepba tejakdangi aoba sayur. Tenangzüktepba nung Iran indang senotsü sota aliba chioktsüba densema lir.

Kasa mapang nung tenangzüktepba nung shilem ka ama US-ia Iran nung tepuoker pongu chioktsü.

Iran nung tepuokertem rognung political scientist aser US nung alir Kaveh Afrasiabi, shiba Iran sorkar indang unregistered agent mapa inyakba atema apu pa den Iran nem tenokdangba agütsür aliba nung aibelenba atema apu pa United Arab Emirates aser Germany nung alir Mehrdad Moein Ansari, meim osang auya Iran dangi yokba atema apusang US nung alir Amin Hassanzadeh, Iran-i ozüing alema laboratory equipment tem yokba atema apusang Reza Sarhangpour Kafrani, Iran-i ozüing alema technology aser osettem yoktsü atema tasa asaba atema apusang arishi küm 44 tain Kambiz Attar Kashani nung densema lir.

Tepuokertem rongnung ana dang Iran-i meyipa arutsü, ta Ministry of Foreign Affairs otongdar kati ashi.

"Parnok rongnung ka par kibong tanga linük nung lir asünung pa iba linüki aotsü aser US nung puoka aliba lisopur anati parnok US nung alitsü ta shiogo, kechiyong parnok iba tesem nung lia liasü," ta Kanani-i ashi.

Maneni bendanger sorkartem den longjemer inyakba aser taanga ken o nung aija apu pa America nung tepuoker asem indang maitsüa jangjaogo.

dang Iran-i meyipa arutsü, ta Ministry of Foreign Affairs otongdar kati ashi.

"Parnok rongnung ka par kibong tanga linük nung lir asünung pa iba linüki aotsü aser US nung puoka aliba lisopur anati parnok US nung alitsü ta shiogo, kechiyong parnok iba tesem nung lia liasü," ta Kanani-i ashi.

Maneni bendanger sorkartem den longjemer inyakba aser taanga ken o nung aija apu pa America nung tepuoker asem indang maitsüa jangjaogo.

Parnok asem rongnung arishi küm 51 tain shishilembar Siamak Namazi ya 2015 küm nungi Evin tepuokdak yua liasü aser pa den arishi küm 59 tain shishilembar Emad Sharghi (2018 küm apu) aser arishi küm 67 taina environmentalist Morad Tahbaz shibai British lisopur jenjang dena bena lir pa 2018 küm pua liasü.

Tepuoker pongu rongnung ana indang maitsü tang tashi mesangdongi lir, saka anüolen aliba linüktem indang media sangdong balala ajanga tepuoker ana rongnung kabo tetsür lir ta metetdaksüogo.

Taoba ita Qatar teyongtsüi ia tenangzüktepba yangluba nung Iran indang sen USD billion 6 salatsütsüba densema lir.

Washington-i 2018 küm Iran indang 2015 nuclear deal nungi atsüingina tenokdangba agütsüba sülen iba sen ya South Korea nung küm ishika sota yua liasü.

Iba sen ya mezüing euro agi melen aser Switzerland-i

transfer asü aser iba sülen tenokdangba magütsüi aliba osettem alitsü atema Qatar nung Iran indang bank troki yoka liasü.

Iran indang Foreign Affairs Ministry otongdar Nasser Kanani-i Hombar anepdang osangbenertem dang, Iran-i sen meyipa anguba aser Iran nung tepuokertem chiokba jangjaba sülen tepuokertem melentepba ya nikongtsütsü tashi nungbo tembangtsü imlar, ta ashi.

Iran tir Ebrahim Raisi, United Nations General Assembly nung shilem agitsü atema Hombarnü New York tonga aoba mapang ka nung tepuokertem melentepogo.

Foreign Affairs Ministry otongdri ashiba agi, Joint Comprehensive Plan of Action (JCPOA) dangi telok ajak meyipa arutsü atema Iran-i maneni lenmang aliba angur aser New York nung iba dak sendakba nung sensaksemtettsü.

Kasa mapang nung Iran aser International Atomic Energy Agency (IAEA) na tang tashi Tehran indang nuclear programme meita ataba dak sendakba ken o tem nung tangatetep makai arudar.

Taoba ita Iran-i France aser Germany nung IAEA inspectors ti mintokogo. France, Germany aser United Kingdom-i US den külemi Iran-i, tesem aika nung uranium amshiba ngutetba densema ken o aika nung international nuclear watchdog den teka amteper minyakaba anema sign süa liasü, aser iba ajanga ketdangsurtem ya mintoka liasü.

OFFICE OF THE
UNGER SENSO BENDANG ALI TELONGJEM
H.Q. Dimapur, Nagaland
Sub Centre

TENÜNGSANG AGÜTSÜR

Ms Rongsenkala Jamitsur,
D/o Mr Imnayanger and Mrs Achila Imsong-i NPSC-i tatitang agiba nung Secretariat Assistant, under Personnel & Administrative Reforms Department kübok tatok ngutetba asoshi la nem tenüngsang agütsür aser Tsüngrem tenüng tali asanger. Maneni Tsüngremi nü taküm moajangma ta USBAT-i sarasademtsür.



Sd/-
N. Lima Imsong
President, USBAT

Sd/-
Walu Jamir
Secretary, USBAT

OFFICE OF THE
LONGKHUM SENSO TELONGJEM
DIMAPUR - 797112 : NAGALAND

TENÜNGSANG AGÜTSÜR

Wb. Tarep Imcheni Indian Administrative Service (IAS) jenjang tongtetba takok asoshi Longkhum Senso Telongjem Dimapur-i pa nem tenüngsang tulu agütsür.

Pai ajangzüktetba takok tajung agi onok nümadangteter aser kanga pelar. Ano maneni tarutsü nunga pa mapa ajak nung takok aser temoatsü ngudakjangma.



Sd/-
Akangyanger
President

Sd/-
Imkumchiba Longkumer
General Secretary

Mulungnen O



ASO:
02/02/1929

ASÜ:
12/09/2023

Temeim ojala ISABELLA, asüku mapang shirnokisa ozü dang nenok temeim mapa, nübu, rongsen, shisatsü aser sarasadem agi yariogo, nenok ajak dang kanga pelaba lemsateper.

Nenek temeim mapa tulu onoki kodanga mamadoktsü. Asen Teyanglur Tsüngremi nenok ajak talubosa moajangma ta ozü tamang sarasadem.

~ Temeim Kinungertem.

Libya tzümettsüng nung asür 3,958 jungogo: UN

Derna, Rongjui/Sept. 18 (Agencies): Libya nung tzümettsüng agi nisung asüba United Nations ajanga taoba mapang züngdanga aliba melenshiogo ta Deobarnep sangdong ka ajanga ashi. Tang tashinung tzümettsüng ajanga iba linük nung nisung asüba 3,958 alitsü, ta World Health Organization (WHO) ajanga ashir. United Nations Office for the Coordination of Humanitarian Affairs (OCHA) ajanga tang tasenba osang agütsüba nung nisung 9,000 dak tema samar bushir, ta ashi.

Libyan Red Crescent ajanga ashiba nung akemdaker iba osang ya agütsü ta ashi. "WHO ajanga jangjatetba nung ajemdaker iba osang ya agütsür," ta Deputy Spokesman for the UN Secretary-General, Farhan Haq-i Deobarnü ashi.

Derna nung tzümettsüng ajanga nisung aika asüba indang UN dang kodanga mashi, ta Libyan Red Crescent Society-i Deobarnü shia liasü.

UN-i kechiba nisung aika asüba osang tiazü agütsü, ta asüngdang dang, lendong timtem balala atalokdang onoki asürtem züngdangba melenshitsuasa akumer, ta Haq-i ashi.

Tzümettsüng ajanga Derna nung nisung 11,300 shi sür alitsü, ta OCHA ajanga taoba mapang shia liasü. UN tentet yagi

(Maneni tapak 8 nung...)

Dimapur nung "Asmita Women's League" ayongzüka agiogo



Dimaapur, Rongjui/September 18 (TYO): "Asmita Women's League" koba taoba mapang "Khelo India Women's League" liasü iba league ya September 18 nü Government Higher Secondary School Ground, Dimapur nung asayaogo.

ASMITA tetezü Achieving Sports Milestone by inspiring Women Through Action lir. Tetsürtem indang league ya Ministry of Youth Affairs & Sports kübok Sports Authority of India-i achaayanga asayar.

Iba sentong nukjidong tongtibangtibaji gender equality ajungkettsü aser saisapong nung tetsürtem shilem agidaktsüsi atema ajungkettsü asoshi lir.

Athletics Federation of India-i September 17 nungi 20 tashi yimti 25 nung Track & Field and Road events ayongzüko aser iba kübok Road event ayongzüka asayatsü atema Dimapur shima liasü.

Nagaland Athletics-i tetsürtem atema lenmang nung asempeba asaya ayongzüko, kong U-16 atema 3km race aser

tetsürtem atema 5km race densema lir. Iba asemtepa ya Govt. Hr. Sec. School Ground, Dimapur nungi tenzüka liasü.

Asemtepa nung asayar 118-i shilem agiogo. Under 16 asemtepa ya Supei S-i akok aser la sülen Kevilenuo Kerhuo aser Mehrin Beck na tanabuba aser tasembuba jenjang nung liasü.

Tetsür category ya Tsuchoi T-i akok aser tanabuba aser tasembuba jenjang nung Songmo P aser Peiheitei Lie na liasü.

Hockey Rankings: India team tasembuba jenjangi tuogo

Rongjui/September 18, 2023 (Agencies): International Hockey Federation (FIH)-i Hombarnü sayaba world rankings nung India tebur hockey team tasembuba jenjangi tuogo.

India team 2022 küm May ita top-3 nungi tuguadokba sülen küm ka dak tema lir tang top-3 tongogo. Taoba ita Chennai nung Asian Champions Trophy 2023 asayaba mapang India team asaya ka nung danga tamakok mongui asayaba sülen tang iba jenjang ajangzüktetogo.

Iba asayamung nung India team-i asaya trok akok aser ka draw süa liasü. England (2745), shirnoki Euro Hockey final nung Netherlands goal 1-2 agi mekoki liasü parnok top-3 nungi tuguogo.

Final tonga parnok kanga

tashi ita asaya saka asayamung nung Belgium makokba aser final nung tamakok anguba sülen parnok India-i ajateta tang pezübuba nung lir.

2023 küm Euro Hockey Championships akokba den FIH Hockey Pro League title abenba aser FIH Hockey World Cup nung bronze medal anguba sülen Netherlands (3113) maneni temaba jenjang nung lir. Iba asaya Netherlands-i amokbanger asaya arudar aser parnok tanabuba jenjang nung aliba Belgium (2989) team dang nungi point aika agi timba lir.

Germany (2689) aser Australia (2544) na pongububa aser trokbuba nung lir aser Argentina (2350) jenjang ka tejakdangi tua Spain jakdang tenetbuba nung lir.

Tetsürtem rankings nung Netherlands (3422) team

temaba jenjang nung lir. Parnoki iba asaya amokbanger asaya-a Championship title 12buba benogo. Tetsürtem team tem rongnung Australia (2818) aser Argentina (2767) na tanabuba aser tasembuba jenjang nung lir.

Euro Hockey Championships nung kanga junga asaya silver medal anguba sülen Belgium (2609) team Germany (2574) jakdang pezübuba nung lir.

India tetsür(2325) team-a jenjang ka tejakdangi tua tang Spain jakdang tenetbuba nung lir. Spain team Euro Hockey Championships nung Belgium aser Scotland na makokba sülen world ranking points 150 dak tema drop süogo.

New Zealand (2001) aser Japan (1900) na maneni teku aser terbuba nung lir aser China (1894) 11buba nung lir.

Libya tzümetsüng nung asür...

(Tapak 7 nungi...)

"Onoki züngdangba ya shidak asü masü ta aiben jangjashir. Asürtem züngdangba nung melenshiba tetetzü onoki aiben jangjashiba ajanga lir. Aser iba ama lendong tulu nung asüba ya timba akumtsü mesüra tajemba akumtsü akok," ta Haq-i ashi.

Tzünglu kanga sashia aruba ajanga Derna temalen tzü nokdang ana Hombarnep apok. Iba tzü nokdang ana nungi tzü

yimzüka aluba ya tsünglanglen Derna jila mubanga liasü. Nisung aikati iba tzü nokdang ana poksadang ola tulu adoka apokba angashi ta ashir.

Molushi aser jana nung züngdangtsü makokba nisung rema lir. Iba tzümetsüng yagi Derna nungi nisung 30,000 shi tesem balalai jena aotsüsa akum, ta UN indang International Organization for Migration

ajanga ashir.

Rara agi raksatsür aliba Syria nung ama Libya nunga küm aika rara agi sünger arur. Totzü peria aliba North African linük nungya 2014 küm nungi tenzüka linük anüdoklen aser anüolen sorkar balala sadanger lir. Derna ya Libya anüdoklen administration-i yimsü asür, kong military commander Khalifa Hiftar tashi tulu amshir.



Advisor Keoshu Yimkhiun-i September 18 nü 23buba NSF Martyrs Memorial Trophy Tenzükogo. Hombarnü mezüngbuba asaya defending champion New Market FC-i Assam Rifles goal 9-0 agi koka liasü.

Khelo India kübok football selection agitsü

Chümoukedima, Rongjui/September 18 (TYO): Chümoukedima District Khelo India Centre, Chekiye Village-i ayongzüka under-14 (tetsür aser tebur) asayartem atema September 23 nü Chekiye Village Ground nung football selection camp ka ayongzüka agitsü.

Anunji Chümoukedima District nung alir shirnoki iba

camp nung shilem agitsü janngar parnok temalen shisema aliba anogo 10:00 ako nung ground tonga arutsü metetdaktüsügo.

Camp dak sendakba nung osang tejangjaba agitsü atema tejangrartemi iba number: 7627942332 ajanga tongteprateptetsü, ta District Sports Officer, Chümoukedima Asekho Talie-i sangdong ka ajanga metetdaktüsü.

Cummins, Smith aser Starc nunger Australia squad nung denogo

Rongjui/September 18, 2023 (Agencies): Australia indang cricket board-i sangdong ka ajanga Pat Cummins, Steve Smith, Mitchell Starc, aser Glenn Maxwell nunger ajak India den ODI asem asayatsü aliba atema one-day international squad-i meyipa aruba metetdaktüsügo.

Par pezüprongla yirur aliba taneptsü ngur tang team nung züngoksemogo.

India aser Australia na September 22 nungi 27 tashi nung Mohali, Indore, aser Rajkot nung ODI asem asayatsü. Iba asayamung ya October 5 nungi tenzüka asayatsü aliba 50-over World Cup atema renemshitsü asoshi maongka tajung ka asütsü.

Cummins ya July ita England nung Ashes Test final asayaba sülen tekanük yiruba ajanga khen danga masayai liasü aser Starc-a groin yirur mapang tatsüka masayateti aruogo. Smith tendon yirur liaka Ashes series nung shilem agiogo aser Maxwell-a tetsüing yirur aliba tajungba kümogo.

Asayar pezüprongla South Africa den ODI asayamung

nung shilem magitet aser Australia team ya Mitchell Marsh lenisüba nung asaya liasü.

Kasa mapang nung batter talila ka ama Matthew Short team nung züngoksemogo aser Travis Head teka tabelen yirur lir.

Opening batter Head ya World Cup nung shilem agitettsü magitettsü mejangjai lir. Pa South Africa den Hokolbarnü asayaba mapang yirua liasü.

"Head Australia-i meyipa aruba sülen temang asadangtsü aser iba sülenang pa kodang nungi asayatetsü aji jangjatsü," ta National Selection Panel-i ashi.

World Cup atema asayar 15 agi kümtetba team sangdongtsü atema Australia asoshi September 28 tashi mapang lir.

Australia squad:

Pat Cummins (captain), Sean Abbott, Alex Carey, Nathan Ellis, Cameron Green, Josh Hazlewood, Josh Inglis, Spencer Johnson, Marnus Labuschagne, Mitchell Marsh, Glenn Maxwell, Tanveer Sangha, Matt Short, Steve Smith, Mitchell Starc, Marcus Stoinis, David Warner, Adam Zampa.

Nortje aser Magala na WC nung asayatetsü masayatetsü mejangja

Rongjui/September 18, 2023 (Agencies): South Africa nunger fast bowler Anrich Nortje aser Sisanda Magala na iba hopta fitness test agiba sülenang India nung asayatsü aliba World Cup nung asayatetsü masayatetsü jangjatsü.

Tenaprongla ya World Cup atema South Africa nungi asayar 15 shimba nung densema liasü, saka tawa Australia den asayaba ODI asayamung nung asaya kaka nung dang shilem agia liasü.

Nortje ya teberem yirur kangshidar aser kasa mapang nung Magala-a temekok tapelen yirur tang anepdaludar.

South Africa team September 23 nü India-i arutsü lir aser team India-i apusoa mao tsüngda tena asayatsü masayatsü iba indang temletetba ka agitsü.

Ajisüka tenaprongla team den külemi India-i motettsü akok.

"Onoki asayar anaprongla maneni asadanga arudar," ta South Africa white-ball coach Rob Walter-i ashiba 'ESPNcricinfo' sangdong ka ajanga metetdaktüsü. SA team-i Australia den ODI asayamung 3-2 agi kokogo.

"World Cup atema aotsü hopta ka danga anunga lia parnok tanü masayatetba ya tebilemstü ka lir. Tena nüba onoki kanga nüngdaker. Yirur aliba asayartem World Cup-i anir aotsü asoshi ken o tebenja lir, kechiyong asayar melentsü atema medical tsütsü kuli agütsütsü nüngdaker," ta paisa ashi.

Nortje aser Magala na masayatetsüsa kümra tena melena Andile Phehlukwayo team nung züngoksemstü akok.

BILEMDANGANG

"Nai nüsasa na memeira tangari na koda meimtsü."